

Sua Exelénsia Representante Diretora Jerál Ministériu Saúde,
Administradór Kámara Munisipál Covalima,
Komandate PNTL sira,
Xefe Komunidade sira,
Diretór Misaun USAID,
Diretora UNICEF iha Timor-Leste,
Médiku no enfermeira sira no distintu bainaka sira

Bondia!

Ha'u kontente bele mai hamutuk ho Diretora UNICEF Valérie Taton, Diretór Misaun USAID Jim Wright no representante sira husi Ministériu Saúde, no ita-boot sira hotu ohin dader iha Sentru Saúde Covalima nian.

Uluk nanain, ha'u hakarak kongratula Ministériu Saúde, governu, no povu Timor-Leste ba sira-nia esforsu hirak ne'ebé susesu nune'e konsege mitiga propagasaun COVID-19 iha Timor-Leste. Timor-Leste nia profisionál saúde no primeiru sokorista sira merese ita-nia agradesimentu espesial.

Maske número kazu COVID-19 iha Timor-Leste menus ona, foin daudaun fó sai tan kazu rua. Ita tenke kontinua vijilante too vírus ne'e eliminadu totalmente, no ita tenke kontinua kumpri rekomendasaun médiku no espesialista sira-nian hodi hamenus risku ba ita-nia an, ita-nia família sira no ita-nia comunidade sira.

Ita sei iha servisu barak atu halo iha futuru hodi bele manan luta hasoru vírus ne'e, ne'ebé kontinua sae makaas iha nasaun barak, inklui ita-nia vijiñu, Indonézia. Ita-nia defeza di'ak liu hasoru virus ne'e maka kontinua pratika ijiene ho loloos, fase liman, distansiamentu sosiál, no uza máskaras bainhira distansiamentu sosiál la posível.

COVID-19 ne'e forte, maibé ita tenke forte liután. Tanba ne'e maka servisu UNICEF halao daudaun, ho apoiu husi Estados Unidos, importante tebes. USAID anuncia ona apoiu fundu ba UNICEF ho valór \$500,000. Osan hirak ne'e sei uza atu responde ba komunikasaun risku, envolvimentu comunidade nian, kontrolu infesaun, no bee no saneamentu iha munisípius lubuk ida – inklui iha Covalima ne'e.

Fundu apoiu ne'e parte ida husi \$1.7 miliaun ne'ebé Estados Unidos fornese ona too agora hodi apoia Timor-Leste nia luta hasoru COVID-19.

Estados Unidos mós nu'udar maior kontribuinte ba organizasaun internasionál multilaterál hodi kombate COVID-19. Ami lidera resposta globál hasoru COVID-19 ho finansiamentu assisténsia estranjeira. Governu Estados Unidos aloka ona \$20.5 biliaun ba desenvolvimentu vasina no terapéutikas, esforsu preparasaun sira, no assisténsia estranjeira seluk-seluk tan. Ami-nia esforsu globál sira bazeia ba Estados Unidos nia investimentu iha tinan barak nia laran iha saúde atu salva-moris no assisténsia umanitária. Ami kontinua asegura katak Estados Unidos nia finansiamentu substánsial no esforsu sientífiku sira kontinua sai parte sentráal no koordinadu husi esforsu iha mundu tomak kontra vírus mortál ida-ne'e.

Mai ita koalia kona-ba ida-ne'e signifika saida iha Timor-Leste. Estados Unidos apoia ona Timor-Leste nia setór saúde dezde independénsia, fornese ona finansiamentu liu \$70 miliaun hodi haforsa sistema saúde no asesu servisu saúde ba ema Timoroan sira. Hanesan Diretór Misaun USAID hatete ona, ne'e signifika rezultadu tanjível sira (bele haree ho matan, kaer ho liman no sente) ba povu iha Covalima maka hanesan: kuidadu saúde kompletu liután, instalasaun saúde moos liután, no rezultadu di'ak liután.

Ami-nia parseria ho UNICEF ajuda haforsa prevensaun no kontrolu infesaun iha instalasaun saúde sira hotu. Pesoál saúde hotu-hotu, pasiente sira, no vizitante sira agora bele ona jere vírus ne'e no mikróbiu sira seluk liuhusi fase beibeik sira-nia liman ho sabaun no bee, no dezinfeta didi'ak superfisie sira. Asaun simples hirak ne'e prova ona nu'udar armas iha funu hasoru COVID-19 no infesaun sira seluk.

Ita mós presiza lembra katak iha tempu ne'ebé ita funu hasoru COVID-19, ita tenke kontinua nafatin esforsu sira hodi trata kestaun saúde sira seluk hanesan: inan isin-rua sira tenke kontinua hetan check-up beibeik no inan-aman sira tenke kontinua lori oan sira ba simu imunizasaun hirak ne'ebé sira presiza. Ne'e batalla ida ne'ebé ita halao iha frentes barak.

Ohin loron ida atu ita selebra. Obrigada ba Diretora UNICEF Valérie Taton no nia pesoál sira iha UNICEF ba sira-nia servisu nakonu ho dedikasaun.

Ha'u dala ida tan agradese no fó parabéns ba governu no povu Timor-Leste nia servisu hodi konfronta emergjénsia saúde públuku ida-ne'e. Estados Unidos sai nafatin parseiru firme ho Timor-Leste iha ninia esforsus hodi kombate COVID-19.